



Juancho Yrausquin

ORANJESTAD - Pakiko Juancho Yrausquin ta fit den e grupo di lidernan cu a pone Aruba para riba su pia ?

Juancho no tabata separatista y tampoco a hiba un campaña basá riba e posicion di Aruba den e constelacion Antiyano.

Tog mester bisa cu Juancho Yrausquin tabatin su propio vision di con Aruba por hanya mas autonomia sin cu ta torno na nos estructura estatal. Ela sinti cu autonomia economico ta e base real, di por ta baas den bo cas.

Juancho a usa un tactica cu no ta di antagonismo. Contrario na e epoca di descriminacion for di cual ela sali, ela unifica e pueblo. E tereno tabata fertil pa e duna

decendencianan di otro paisnan e derecho di agrupa den su partido. Esey a pone cu tabatin Windward Islands Section, Grupo Politico Curazoleño y e mesun cos pa esnan di Bonairó y Surinam. Nan a bira e weso di lomba di e movimiento.

Na e mesun momento cu ela bira e homber fuerte di Aruba, ela forma un alianza cu partido Democraat na Corsow, cu a haciele mas fuerte y a duna Aruba pa promebiaha un voz duro. No por laga afo cu e tabata afortuna di tin lasonan di famia cu e partido ey, di moda cu e exigencianan di Aruba no tabata "demanda", sino "suplica" cu argumento.

E credito mas grandi cu ta ser duna na Juancho Yrausquin tabata e fundeshi economico cu ela duna Aruba, pa nos ta menos dependiente di e refineria. Hunto cu e crea-

cion di turismo y industria ela percura pa tur cas tin awa, coriente, etc. loke e tempo ey nan a considera e progreso mas grandi cu Aruba a conoce.

Si analisa tur esey ta comprendibel cu den e epoca ey e lucha pa autonomia no a hanya mucho atencion cerca pueblo. Un pueblo den pleno progreso por lo general no ta kibra su cabez cu asuntonan estatal. Mas ainda cu den e epoca ey Juancho tabata garantisa cu Aruba tabata hanya tur e atencion y e respet cu e merece !

Ta indirectamente so por bisa cu e nomber di Juancho ta fit den e grupo di cuater. Despues di su morto, ya Aruba no tabata capaz pa sigui e caminda di mas decentralisacion y autonomia !

Ya su movimiento no tabatin e poder pa sigui e caminda cu ela scohe.